

四庫全書

集部

欽定四庫全書

會稽掇英總集卷四

宋 孔延之 撰

山水中

剡中

道經云兩火一刃可以逃言多名山可以避災也故漢
晉以來多隱逸之士沃洲天姥皆其處也

律詩

宿沃洲山寺

魏徵

崆峒山叟到江東，荷杖來尋支遁踪。
馬跡幾經青草沒，仙壇依舊白雲封。
一聲清磬海邊月，十里香風澗底松。
何代沃洲今夜興，倚欄來聽赤城鐘。

知袁郎中破賊後經剡中山水

皇甫冉

武庫分帷幄，儒衣事鼓鼙。
兵連越徼外，寇盡海門西。
節比全疏勒，功當雪會稽。
旌旗迴剡嶺，士馬濯耶谿。
受律梅初發，班師草未齊。
行看佩侯印，豈得訪丹梯。

舟行入剡 崔顥

鳴棹下東陽，迴舟入剡鄉。
青山行不盡，綠水去何長。
地氣秋仍濕，江風晚暫涼。
山梅猶作雨，谿橘未知霜。
謝客文逾盛，林公木可忘。
多慙越中好，流恨閱時芳。

別諸筓之剡中 李白

借問剡中道，東南指越鄉。
舟從廣陵去，水入會稽長。
竹色谿下綠，荷花鏡裏香。
辭君向天姥，拂石卧秋霜。

剡中有獻 并序 秦系

系家於剡山向盈一紀大厯五年人以文聞於鄴守薛
公無何奏系右衛率府曹叅軍意所不欲以疾辭免因
將命者輒獻斯文

由來那敢議輕肥散髮行歌自採薇逋客未能忘野興
辟書今遣脫荷衣家中匹婦空相笑池上羣鷗盡欲飛
更乞大賢容小隱益看愚谷有光輝

路入剡中作

方干

戴灣衝瀨片帆通高枕微吟到剡中掠草並花憐燕子

停梳獨飲學漁翁
波濤漫滅長潭月
楊柳斜牽一岸風
便擬乘槎應去得
仙源直恐接星東

和別縣陳明府登縣樓

方干

郭裏人家如掌上
簷前樹木映牕櫺
煙霞若接天台地
分野應侵婺女星
驛路古今通北闕
仙谿日夜入東溟
綠衣才子多吟笑
公退時時見畫屏

雨霽剡谿

錢昭度

剡谿風雨霽
航葦重行行
到處楊柳色
幾家荷葉聲
噪

蟬金鼎沸游水玉壺清最喜魚梁伴歸帆的的輕

剡谿唐郎中所居

趙湘

古柳垂谿水當門繫雪舟開池延白鳥掃樹帶清秋閣
上看華頂窻中見沃洲尋常投刺少來即是詩流

剡郊野思

林滌

密樹芳穠碧草齊春華微度綠陰低谿連嵒水興何盡
路接仙源人自迷落絮有情風上下好花無語日東西
故園桃李經年別一望歸心遶翠蹊

丁中允宰剡 陸經

塵土官曹幾處間，今君得邑好開顏。
落帆直向剡谿口，入境先登天姥山。
魚鳥半和風俗處，雲霞多雜簿書間。
雪晴須去尋安道，不作經宵興盡還。

自諸暨抵剡四首 吳處厚

莫嘆塵泥汨且圖，山水遊維峯天姥。
翠一舸剡谿秋不見，戴安道有懷王子猷。
西風無限意盡屬釣魚舟。

其二

夷猶雙槩去莫不辨東西夕照偏依樹秋光半落谿風
高一鴈小雲薄四天低莽蕩孤帆卸水村楊柳堤

其三

秋渚橫空碧秋山刷眼青排頭煙樹老撲面水風腥上
瀨復下瀨長亭仍短亭夜船明月好客夢滿流螢

其四

出得雲門路風悽日夕曛船撐鑑湖月路指沃洲雲山
色周遭見谿流屈曲分一觴還一詠誰似右將軍

古詩

剡谿行却寄新別者

朱放

潺湲寒谿上自此成離別
回首望歸人移舟逢暮雪
頻行識草樹漸老傷年髮
唯有白雲心為向東山月

剡谿舟行

六言 朱放

月在沃洲山上人歸剡縣谿
邊漠漠黃花覆水時時白

鷺鷥船

晚泊埭浦寄剡縣劉貺負外

潘閔

曉泛剡谿水晚見剡谿山徘徊駐行棹待月思再還漁
唱深潭上鳥棲高樹間應當金石交念我無暫閒

贈剡谿桃源宮王道士

沈邁

我昔剡谿遊道人一相遇重來十歲餘顏色宛如故顧
我病衰早鬢毛已蒼然乃知世上榮詎若山中閒道人
家東都問胡不歸北北方多風塵素衣化為黑斯言吾
所信吾志亦江湖瀟灑會稽守平生欣莫如君恩容苟
安願奉三年計幸爾數到城間談北方事

遊沃洲山真封院

井序

吳處厚

越山惟沃洲最著樂天之記詳矣晉人喜曠達而尚清虛故山水之遊一時特盛在九江廬阜則浮屠慧遠為之主而宗雷輩十有八人從之在剡之沃洲則浮屠支遁為主而王謝輩亦十有八人從之要皆遁世避地相與為方外之適耳余嘗歷九江浮潯陽過於柴桑之間訪其所為東西二林者而慧遠宗雷之迹往往猶可辨識徘徊不能去者久之念沃洲窟於一隅無因而至上下其心者數矣

近偶祇役於新昌初甚不憚徐而聞沃洲乃在其境遂挈而東不憚奔走頓撼之勞欲促償其願又且幸為沃洲一時主人也一日風甚寒天姥盛雪適會邑有移文乘輿便往值暝不及遂宿於梅林僧舍平明過真封院先至養馬坡陟鵝鼻峯入門謁道猷影堂訪支遁庵基觀錫杖泉前眺放鶴峯徘徊而還大抵山川氣象皆荒替彫落非鄉時所聞之沃洲也雖然環抱之意趣奔驟之態度尚皆一一可愛迺知古人選勝皆有所謂唯嗜山之深者知之不可

為俗人言也因為古格長韻以紀之云

幼年曾讀樂天碑及壯亦覽高僧傳聞有沃洲風景佳脚
未能到心空羨近至新昌披縣圖此山乃在吾廡閣想像時
時掛夢魂欲一遊之念無便夜來人報天姥雪今日趨晴初
出縣酸風瞥瞥吹我鬚寒氣稜稜刮人面半膝短衫翩以輕
獨脚小鷲快而健不知路入幽澗長但覺山隨白雲轉靠昏
投宿梅林村侵卯便過真封院新霜滑澗行李難一步一住
一迴眩養馬坡前秋草黃駭骨已埋無復見放鶴峯頭樹影

孤鶴不來歸雲漫漫入門觸物皆荒涼塵几蠹經三五卷鳴
鷄叫噪逸生臺野色毡毳集寒殿老杉千尺惟空腔猶有枯
藤半縈纏憶昔江左全盛時十有八人皆俊彥或吟或嘯或
遨嬉不覺回頭唾纓弁林泉耽味久成癖魚鳥留連老忘倦
前有道猷後法潛錫杖卓泉堅志願晚則道林經構之左右
前後遂完繕煙霞一窟直幾錢買醜商量價何賤聚徒數百
日高談供有香花齋有麩歲時浸久山浸荒種粟燒畝耕掘
徧茂林髡鬢無幾存莽蕩周回空一片惟餘熟水清汪灣百

匹秋光瀉寒練古今興廢盡如斯欲去使人還戀戀

天姥律詩

登天姥

李敬芳

天姥三重嶺危途繞峻谿水喧無晝夜雲暗失東西問
路音難辯通樵跡易迷依稀日將午何處一聲鷄

古詩

夢遊天姥峯

李白

海客談瀛洲煙濤微茫信難求越人道天姥雲霓明滅

或可觀天姥連天向天橫勢拔五嶽掩赤城天台四萬
八千丈對此欲倒東南傾我欲因之夢吳越一夜飛度
鏡湖月湖月照我影送我至剡谿謝公宿處今尚在淶
水蕩瀟青猿啼脚着謝公屐身登青雲梯半壁見海日
空中聞天鷄千巖萬壑路不定迷花失石忽已暝熊咆
龍吟殷上聲巖泉慄深林兮驚層巔雲青青兮欲雨水
澹澹兮生煙列缺霹靂丘壑崩摧洞天石扉訇然中開
青溟浩蕩不見底日月照耀金銀臺霓為裳兮風為馬

雲之君兮飄紛紛而來下虎鼓瑟兮鸞迴車仙之人兮
列如麻忽魂悸以魄動恍驚起而長嗟惟覺時之枕席
失向來之煙霞世間行樂亦如此古來萬事東流水別
君去何時還放白鹿青崖間須行即騎訪名山安能推
眉折腰事權貴使我不得開心顏

題天姥

老僧靈傲

天台眾峯外歲晚當寒空有時半不見崔嵬在雲中

五泄山律詩

五泄瀑布也在諸暨西四十里有兩山夾谿造雲壁立
高二百丈廣數十丈水瀉五節故曰五泄下有龍湫歲
旱請雨輒應寺曰應乾山多奇峯或比之雁蕩云

遊五泄山

劉述

翠屏千疊水潺潺一簇青鴛杳靄閒惜是晚年逢此境
到任二年後
悔將前眼看他山瀑飛蘿磴終難畫龍蟄
方遂此遊

巖雲祇暫閒薄宦勞人無計住可嗟歸去又塵寰

同前

唐詢

尋徹靈潭第五源旋攀蘿葛至山巔寒聲昔謂來天外
巨壑今知在目前峭壁無時長蔽日重巖不雨亦生煙
臨觀已覺塵心盡更欲凌雲訪列仙

其二

遊徧西潭返步遲亂雲隨履雨沾衣山形相向還相背
獨有溪流共我歸

同前 刁約

西源窮盡到東源直注層崖五磴泉真境無繇追汗漫

勝遊聊得弄潺湲風生虎嘯層巖底月上猿啼古木顛
祇待歸休林下去來同靈默此安禪

同前

吳處厚

煙霞一塢兩山源石壁寒垂瀑布泉人事是非空繚繞
水聲今古自潺湲月留吟客眠寒榻風送樵翁下翠巔
檀篆未消爐火燠夜長人靜好談禪

招通判沈興宗遊五池

丁寶臣

路緣蘿蔦蔭杉松翠壁丹崖不計重天作錦屏環十里

僧開朱屋面千峯花間越鳥鈎翰語谿外秦人髣髴逢
早晚車騎到山下籃輿多日待追從

遊五泄書呈完夫節推

丁寶臣

莫厭幽尋路險辛細思容易是山神能收地巧藏深處
不惜天竒示俗人古有少陵吟未到今無摩詰書難真
海邊見說天童好祇待君詩判等倫

四明惟天童景號
竒絕完夫言回日

當徧遊

諸山

和胡宗愈

喜陪詩伯尋幽去從此風騷覺有神明代應無高遜士
奇峯盡屬苦吟人欲名地巧題難得却恨圖經說未真
回想天童山迤邐更多形勝亦非倫

留題洞巖

宋禧

翠巖仙洞白雲深躡石捫蘿一訪尋真馭不逢山色暝
澗風吹袂冷林林

古詩

同前 劉述

英英洞口雲觸石纔一縷須臾徧空山霈然作靈雨萬物一以澤孤蹤無處所我心良所珍作詩以自矩

五泄山三學院十題

并序

僧咸潤

予從佛業智者教動息忻山水之樂嘗聞永嘉雁蕩名甲宇內咸平中卷衣而遊果見松石之怪峯嶺之秀綽然天造而彌年誦詠不足且謂越中山水名而不實洎寶元二禩中秋月因報恩智仁法師率遊郡之句無五泄山其山去縣不遠一舍平川孤起怪峯顛巒轉入轉

幽駭悅心目不覺喟然曰子之居越而不知越有茲勝
槩者何異魯人不知仲尼之聖耶方之雁蕩諒無慚焉
遂抽軋思偶成十題雖辭理無趣姑俾坐談越絕山水
為不誣矣噫謝公白氏樂稱天下林泉而茲山吟詠無
聞者蓋僻而且深匪邁昔賢之留盼爾亦猶君子守道
丘園為時之所棄者良可惜哉題成於應乾蘭若序

五泄

飛泉成五級一級一龍湫削出萬仞秀詎讓蓬萊丘

西源

造化鑿坤維千巖闕空碧有時雲雨開殘陽落幽石

夾巖

一徑數里間巉巖鎮幽谷中夾清谿流白雲長斷續

龍井

寒井深無極人謂藏虬龍嘗聞救炎旱絲雨灑長空

石鼓

巨石平如掌天然狀鞀鼓擊之還有聲分明含太古

石門

雙峯起雲際
髣髴五侯門
煙霞鑠不開
曾無車馬奔

石屏

峭石狀危屏
截斷諸峯清
白雲觸不飛
仙掌空遺名

俱胝巖

有僧持誦俱胝呪於此因得名焉

昔人持此呪
巖坐歲寒深
梵言不復聞
雅名流至今

禱雨潭

嘗聞越邑民
禱雨碧巖畔
神龍如有期
為霖通旱暵

摘星巖

捫蘿梯峭石直上青雲端
咫尺星斗光冷射人心寒

石傘峯律詩

銘附

玉笥山書堂石傘峯放夫銘

顧況

亭亭石傘有物有名如蓋若傾如芝一莖又如搖袂拂
著上清俯踏不平仰捫雲行石傘山東山銜日宮石傘
山西山銜月宮南巒北阜首出屹雄千里在掌五更見
日我來豫疾毛豎汗出齊侯賁趾以隱為榮徃徃洞穴

聞金奏聲椽栗裹險猿猴相爭喬木千尋凡人幾生芳
樹冽泉憎夫惶惚螺旋錦沓鶴鳴山空杳兮神乎不宰
其功

石傘峯書堂

齊唐

傘峯一片崎危石枕在青冥絕壁間人作鹽梅資世濟
跡留巖岫與雲間露盤高出長年殿羽蓋斜臨宛委山
貌矣諸孫媿前躅但開三徑掩柴關

同前

祖無擇

伊人高步接夔龍，舊隱荒涼石傘峯。
莘野躬耕聞往事，傳巖代築見遺蹤。
草茅豈合淹宗業，竹帛終能紀茂庸。
朝暮油雲膚寸合，何妨霖雨徧三農。

同前

元絳

竒峯如繖見遙青，玉笥山頭地有靈。
三徑荒涼丞相隱，一篇清絕放夫銘。
孤標竦處天門近，直影圓時日御停。
誰躡巖梯訪遺跡，遠孫高謝在鴻冥。

古詩

登石傘峯

并序

陳諫

中書侍郎平章事高陽齊公昔遊越鄉閱翫山水者垂三十載初棲於剡嶺後遷於玉笥自解薜此山未二紀而登台鉉乃施舊居之西偏為昌元精舍其東偏石傘巖付令弟秀才推俄而中書即世推高尚之致文行之美與伯氏相侔至元和九年秋九月七日浙東廉使越州牧兼御史中丞楊公洎中護軍王公率僚佐賓旅同遊賦詩紀登覽之趣小子承命序其梗槩以冠篇竊謂

斯地也斯文也必傳於後世與蘭亭東山俱為越邦之
不朽者矣

詩 齊推

能以郡中暇不遺塵外蹤嘯倚得鴛鴦揮策入雲松緣
徑歷空際望崖來劍峯況當會天人復此陳歌鐘賤子
固多癖偶茲安一峯步林欣有適築室幸可容寧期樵
牧處忽與軒蓋逢仰荷高興屬俯慙危磴重攀幽破巖
靄踐滑觸苔封秋景山光動寒叢菊豔濃賞心愜觴酌

逸韻陶襟胃仍叨勒名氏永紀今所從

答

楊於陵

夙志慕遐嶠偶時叨撫封幸茲秋成候得與心期從宛
在洲渚外稍躋林嶺重紫垣感嘉惠丹壑暢幽蹤之子
綽有裕結廬枕前峯亭臺互虧蔽物象分輕濃玉傘踐
危石苔枝棲古松登攀逐羣彥息偃慙衰容闔闔如可
接靈仙疑暫逢海帆去的的霜雁來嚶嚶赫奕護軍重
導迎裨將恭迴舟遲新月整吹引疎鐘

同前

王承群

作鎮得良牧撫戎慙匪仁每觀龔黃化煦物如陽春政
簡自多暇遊從邀衆賓鳴騶鏡水畔捨棹耶谿津偶茲
逢勝境頓覺離囂塵丞相築室在季方結廬新登臨經
絕頂矚眺怡心神金章炤玉傘龍節陵松鱗笙歌入中
流輦角聞城闥更吟瓊瑤篇願言書諸紳

同前

陳諫

賢相昔未遇耶谿藏卧龍宛然東山居已韻西林鐘仲

氏亦遐曠爾來習高踪楊公偶閒暇中貴同遊從曲渚
擁騶馭迴潭轉艨艟既登寅緣岸遂踐岵堯峯徑側縈
巨石磴危攀茂松傘開自羅列筭閉誰緘封迴立霄漢
表俯看巖嶂重遠村暮杳杳秋海晴溶溶染翰紀勝絕
飛觴暢心胃仍聞待新月歸棹何從容

同前

衛中行

威鳳昔未起茲山嘉氣深逶迤抱川阜蘿蔦方沈沈龍
節梢巖徑星軒伴幽尋嘗聞謝公事今嘉昭曠心絕頂

上巍峩秋晨好登臨蘆洲辨微色天籟聞虛吟支策睇
歸潮舒情凝遠岑徘徊繞靈傘登坐延芳襟谿路鏢重
扃松門交翠陰貞姿在空谷瑞色仍棲林晚靄覆迴汀
輕橈環碧潯探竒幸陪唱願繼咸池音

同前

路黃中

總戎詣幽勝天使相追隨躋山玉笥號到峯石傘竒接
武白雲表放情玄月時恬曠溥沆瀣峻極超崦嵫平視
羲和轡俯觀朝夕池巖中復何揖坐位多所宜郁烈桂

香眇寅緣霞彩披孤光逗綺翼獨秀分瓊枝靈氣達心
久華容招目移遂忘日云暮登降不知疲眷言丘壑士
養節松竹滋感激旌蓋顧予以獻貞詞

會稽掇英總集卷四

欽定四庫全書

會稽掇英總集卷五

宋 孔延之 撰

山水下

四明山

在餘姚縣南百餘里高二百一十丈周回二百一十里孫
綽天台賦云涉海則有方丈蓬萊登陸則有四明天台云

律詩

石牕

陸龜蒙

石牕何處見萬仞倚晴虛積靄迷青瑣殘霞動綺疏山
應列圓嶠宮便接方諸祇有三峯客時來教隱書

過雲

相訪一程雲雲深路僅分嘯臺隨日辨樵斧帶風聞曉
著衣全濕寒衝酒不醺幾迴歸思靜彷彿見蘇君

雲南

雲南更有谿丹礫盡無泥藥有巴賈賣枝多越鳥啼夜

清先月午秋近少嵐迷若得山顏住芝萐手自攜

雲北

雲北是陽川人家洞壑連壇當星斗下樓抄翠微邊一
半遙峯雨三條古井煙金庭如有路應到左神天

鹿亭

鹿亭巖下置時領白麝過草細眠應久泉香飲自多認
聲來月塢尋跡到煙蘿早晚吞金液騎將上絳河

樊榭

樊榭何年築人應白日飛至今山客說時駕玉鱗歸乳
蒂懸松嫩芝臺出石微憑欄虛目斷不見羽華衣

潺湲洞

石淺洞門深潺湲萬古音似吹雙羽管如奏落霞琴倒
穴漂龍沫穿松濺鶴襟何人乘月弄應作上清吟

青櫺子

山實號青櫺環岡次第生外形堅綠殼中味敵瓊英墮
石樵兒拾敲林宿鳥驚亦應仙吏守時取薦層城

鞠侯

何事鞠侯名先封在四明但為連臂飲不作斷腸聲野
蔓垂纓細寒泉佩玉清滿林遊宦子誰為作君卿

和

石牕

皮日休

穴開自真宰四達見蒼崖苔深渾成綺雲漫便當紗櫺
中空吐月扉際不扃霞未會通何處應連玉女家

過雲

粉洞二十里當中幽客行片時迷鹿跡寸步隔人聲以
杖探虛翠將襟惹薄明經時未過得恐是入層城

雲南

雲南背一川無雁到峯前墟野生紅藥人家發白泉兒
童皆似古婚嫁盡如仙共作真官戶無由稅石田

雲北

雲北盡冥冥空疑背壽星犬能諳藥氣人解寫芝形野
歇遇松蓋醉書逢石屏焚香住此地應得入金庭

鹿亭

鹿羣多此住因構白雲楣待侶傍花久引麝穿竹遲經
時楛玉澗盡日嗅金芝為在石牕下成仙自不知

樊榭

主人成列仙故榭獨依然石洞闕人笑松聲驚鹿眠井
香為大藥鶴語是靈篇欲買重樓隱雲峯不售錢

潺湲洞

陰宮何處源到此洞潺湲敲碎一輪月鎔銷半段天響

高吹谷動勢急歆雲旋料得深秋夜臨流盡古仙

青檮子

山風熟異果應是供真仙味似雲腴美形如玉腦圓銜
來多野鶴落處半靈泉必共玄都棹花開不記年

鞠侯

堪羨鞠侯國碧巖千萬重煙蘿為印綬雲壑是提封泉
遣徂公護果教禪子供爾徒如不死應得躡玄蹤

浙江

越之通道有四江西接錢塘曰浙江去城西四十五里
曰錢清江州之東七十里曰曹娥江餘姚縣曰姚江

律詩

越江秋晚

蕭穎士

扁舟東路遠
曉月下江濱
瀲灩信潮上
蔥蒙孤嶼分
林聲寒動葉
水氣曉連雲
暎日浪中見
榜歌天際聞
伯鸞常去國
安道昔離羣
延首剡谿近
詠言懷數君

濟江問舟人

孟浩然

潮落江平未有風，扁舟共濟與君同。
時時引領望天末，何處青山是越中。

西陵夜居

吳融

寒潮落遠汀，暝色入柴扃。
漏永沈沈靜，燈孤的的青。
林風移宿鳥，池雨定流螢。
盡已成愁絕，啼蛩莫近庭。

泊姚江

王相

軋軋櫓聲急，蒼蒼江日低。
吾行有定止，潮汐自東西。

其二

山如碧浪翻江去水似青天照眼明
喚取仙人來此住
莫教辛苦上層城

江潮阻風

陳堯佐

按部谿山接海濤連天風雨泊輕舸
滄溟未必全勝我
潮落潮生亦自勞

過漁浦作

刁約

一水相望越與杭渡頭人物見微茫
翩翩商楫來谿口
隱隱耕犁入富陽
市肆凋疎隨浦盡
山峯重疊傍江長

民瞻熊軾咸相謂太守經行此未嘗

古詩

乘潮至漁浦

陶翰

艤棹乘早潮
潮來如風雨
棹亭忽已隱
界峯莫及覩
崩騰心為失
浩蕩目無主
虬壺浪始開
漾漾入漁浦
雲景共澄霽
江山相吞吐
倬哉造化靈
此事以終古
流沫成足誠
商歌調易苦
頗因忠信全
客心猶栩栩

西陵口觀潮

薛據

浙江漫湯湯近海勢彌廣在昔胚渾凝融為百川長地
形失端倪天色潛滉瀆東南際萬里極目遠無象山影
乍浮沈潮波忽來往孤帆或不見棹歌猶響像日暮長
風起客心空震蕩浦口霞未收潭心月初上林嶼幾遭
迴亭臯時偃仰歲晏訪蓬瀛真遊非外獎

旦發漁浦潭

丘希範

漁潭霧未開赤亭風已颺櫂歌發中流鳴鞞響沓嶂村
童忽相聚野老時一望詭怪石異象嶄絕峯殊狀森森

荒樹齊杳杳寒沙漲藤垂鳥易陟崖傾嶼難傍信是永
幽棲豈徒暫清曠坐嘯昔有委卧治今可尚

夢越州小江

在城西之
三十里

錢易

越布縫單衾燈青月黃淺精魂渡江水適去無近遠濕
沙平朔天宿鳥踏古篆巨潮淹積石瘦白澀無蘚榜嚮
期西陵蒼岑屏曲展夙齡賤登臨今日生健美汀洲逢
故妾振袂指吳苑向人呼舊官血泣慙孤寒

受代還自越中早發赴浙江潮

王素

三載勤吏職去思乏
昨謠還隨半夜月又
起五更潮鷺棹辭
枉渚揚帆信歸颿
山陰多勝託小隱
欲相招

山水雜詠

律詩

龍井

王相

山腰石有千年潤
石眼泉無一日乾
天下蒼生待霖雨
不知龍向此中蟠

其二

人傳湫水未嘗枯滿底蒼苔亂髮麤四海旱多霖雨少
此中端有卧龍無

登越山

李親

臘後梅花破碎香望中情地轉淒涼遊山祇道尋高處
高處何曾見故鄉

題清化山

許安世

霜鐘清徹隔村聞南渡橫塘曉色分淺淺谿流涵白石
微微山路入青雲勞生已負林泉約薄宦空增世俗紛

見說定香無妄想為祛塵惑借餘薰

青蓮山

楊埏

撥開瑟瑟青蘿帳尋得磷磷白石梯更入雲霞最深處
忘機數日遂幽棲

郎官巖

碧玉莫嘉千嶂石黃金難買一谿雲歌鐘沸地徒誇盛
爭似松風竟夕聞

碧澗亭

妙筆王維圖莫就多才康樂詠難窮樓臺一簇出雲杪
激雪浪生寒澗風

古詩

題上虞蘭芳山

陳堯佐

巖巖一峯千萬尋微茫樓閣寒雲深
巡州佐吏倚欄久
泠泠天籟清塵心

尋餘姚上林湖山

謝景初

山水有奇秀何必耳目親
茲地世未知偶游良可珍

平湖瞰其中翠嶽圍四垠青松千萬植落瀑如懸巾佛
廟聳殿塔裝點繪畫新清谿與斷崖水石聲磷磷峯巔
見滄海日出常先晨花草時節異寧問秋夏春陵谷千
萬古豈無稱道人得微言不信又恐遠故堙樽酒且樂
我醉來事事均

觀餘姚海氛

海上風與雨未暎先氣升澤鹵雜山雲翁鬱相薰蒸交
語面已障安辨丘與陵衣濡帶草緩臭腥殊可憎自非

昌其陽疾癘得以乘君子却陰邪何必醫師能

餘姚董役海堤有作

五行交相陵海水不潤下處處壞堤防白浪大於馬顧
予為其長恐懼敢暫捨董衆完築塞跋履率曠野使人
安於生茲不羞民社調和陰與陽自有任責者

觀仙居山瀑布

落泉下峭壁斗絕千萬丈濺急雪片飛望若匹練廣曲
嶺隔青林三里已聞響其旁有巨石平潤可俯仰愚俗

所不道我輩偶來賞須期秋色清攀蘿將爾上

會稽山

張伯玉

稽山何崔嵬莫此東南區羣山狀趨附萬壑流縈紆疇
昔大禹來簡計天下書諸侯率磨至萬玉爭見趨防風
獨強梁後至行趨趨天威不可捨敗骨盈高車至今焦
悴煙慘澹藏封隅封隅山防風邑遂令百世後尊王無異圖乃
知聖人心賞罰盡貽謨



會稽擬英總集卷五

欽定四庫全書

集部

會稽擬英總集卷八

六至

詳校官中書臣張經田

助教臣常循覆勘

總校官庶吉士臣倉聖脉

校對官中書臣田尹衡

謄錄監生臣馮堪

欽定四庫全書

會稽掇英總集卷六

宋 孔延之 撰

雲門寺律詩

晉義熙三年王子昭嘗居是山有五色雲晝見庭戶
表奏安帝乃建寺曰雲門至會昌寺廢大中復興今
朝改額曰雍熙顯聖淳化三寺

宿雲門寺

羅鄴

金少日... 卷六
寺入千巖石路長孤吟一宿遠公房卧聽半夜杉檉雨
轉覺中峯枕簟涼華界卒無悲苦念塵襟還自是非忙
他年縱若重來此息得心猿鬢已霜

其二

入松穿竹路難分藉地連巖總是雲欲問老僧多少事
亂泉相聒不相聞

同前 錢起

山寺宜靜夜禪房開竹扉支公方晤語孤月復清輝一

磬響丹壑千燈明翠微平生厭浮世茲夕更忘歸

同前

薛能

初宵門未掩獨立對霜空極目故鄉月滿池寒草風樵
聲當嶺上僧語在雲中正恨歸期晚蕭蕭聞塞鴻

同前

項斯

松葉重重覆徑微黃昏谿上見人稀月明半寺客初到
風動間門僧未歸山果經霜多自落水螢穿竹不停飛
行人始得中宵卧又被鐘聲催著衣

同前 劉得仁

上方僧又起清磬出雲初
吟苦曉燈暗露零寒草踈
舊山多夢到流水送愁餘
寄寺欲經歲慙無親故書

同前 顧非熊

夜香聞偈後岑寂掩柴扉
照竹燈和雪看松月到衣
草堂踈磬斷山寺故人稀
翻憶湘南雨春風獨鳥歸

同前 顧況

野人愛向山中宿
况在葛洪丹井西
門前有箇長松樹

半夜子規來上啼

同前 宋之問

維舟入淨域作禮事尊經投迹慮消散為心自杳冥
龕交大禹穴樓倚少微星沓嶂圍蘭若迴谿抱竹庭
覺花塗砌白甘露洗山青鴈塔騫金地虹橋轉翠屏
人天宵合影神鬼晝潛形理勝常宗寂緣空日感靈
入禪從鶴繞說法有龍聽劫累終期滅塵躬豈暫寧
搖搖不安寐待月詠巖扃

憶雲門

樹間煙不破，谿靜鷺忘飛。
更愛幽奇處，斜陽豔翠微。

贈雲門靈一律詩

姚邵

梵書鈔律千餘紙，靜坐焚香獨受持。
童子病來煙火絕，清泉漱齒過齋時。

再遊雲門

方干

嶺頭雲向窓中起，砌下泉從石上來。
僧老終無出山意，巖猿澗鳥莫相猜。

題靈一上人新泉

劉長卿

東林一泉出復與遠公期
淺澗春流處空山夜月時
夢間聞細響慮淡對清漪
動靜皆如此唯應道者知

送鮑侍御宿雲門

嚴維

小令遺蹤在仙郎
向夕過潭空觀月定
門靜見雲多竹色香
煙染松聲雨點和
還聞上方磬後夜梵如何

陪獨孤中丞遊雲門

絕壑開花界耶谿極上源
光輝三石座登陟五雲門
深

木鳴騶馭晴山耀武賁亂泉親坐卧疎磬發朝昏蒼翠
新嵐色莓苔積雨痕上方看度鳥後夜聽吟猿異迹焚
香對新詩酌茗論歸來還撫俗諸老莫攀轅

題雲門一上人新泉

山下新泉出泠泠比法源落花纔有響濺石未成痕獨
映孤松色殊分衆鳥喧唯當清月夜觀此啓禪門

遊雲門

趙嘏

五雲谿影裏萬慮淡涼天紅葉斜堦日清風滿寺蟬幾

多長道路一餉暫留連
惜別踈鍾去看山坐水邊

同前 姚邵

千重山崦裏樓閣影參差
未暇尋僧院先看置寺碑
竹深行漸暗石穩坐多時
古塔龍蛇善虛廊鳥雀癡
雲開上界近泉落下方遲
為愛青桐葉因題滿樹詩

同前 元稹

遙泉滴滴度更遲
秋夜霜天入竹扉
明月自隨山影去
清風長送白雲歸

同前 崔子向

長松落落勝天台
佛殿經窻半嶺開
郭裏鐘聲山裏去
上方流水下方來

同前 杜牧

雲門寺前逢猛雨
雲黑山高雨脚長
曾向郊宮為近侍
分明擬擬羽林鎗

再遊雲門宿空上人故院 馬戴

雲門秋却入微徑
寂無人後夜中峯
月空林對坐身寂

寥寒磬斷盥漱瀑泉新
隱跡復誰見松枝拂石塵

再遊雲門訪僧不遇

薛能

數歇渡深水漸非塵俗間
泉聲入秋寺月色徧寒山
石路幾迴雪禪房又閉關
不知雙樹客何處與雲間

招皇甫冉遊雲門

僧靈一

湖南通古路來往意無涯
欲識雲門寺千峰到若耶
春山子敬宅古木謝敷家
自可長偕隱那言相去賒

陪元相公遊雲門

趙嘏

松下山前一徑通
燭迎千騎滿川紅
春雲乍斂幽巖雨
曉氣初開大旆風
小檻燕花容客醉
上方看竹與僧同
歸來吹盡巖城角
路轉橫塘亂水東

同僚友遊雲門

張謂

共許尋雞足誰能惜馬蹄
長空盡雲雨斜日半虹蜺
簾外千峯轉窻前萬木低
看花尋徑遠聽鳥入林迷
地與喧卑隔人將物我齊
不知樵客意何事武陵谿

宿雲門東客院

蕭翼

路入山西更向西
雨和春雪旋成泥
風吹疊巘雲頭散
月照平湖鴈影低
拄杖負書尋遠寺
倩童牽鹿渡深谿
今朝獨宿巖東院
唯聽猿吟與鳥啼

留題雲門

絕頂高峰路不分
煙嵐長鎖綠苔紋
獼猴推落臨崖石
打破下方遮月雲

宿雲門香閣院

李裒

香閣無塵雪後天
石盆如月貯寒泉
高僧洗足南軒罷

還枕蒲團就日眠

宿雲門上方 秦系

禪室遙看峰頂頭
白雲東去水常流
松間儻許幽人住
不更將錢買沃州

泛若耶宿雲門 于武陵

谿船泛數里
漸覺少炎暉
映水花連影
逢人鳥背飛
深猶見白石涼
好換生衣未得多
詩句終須隔宿歸

題雲門 楊衡

千峯白露後石壁掛殘燈曉色海邊日經聲松下僧意
閑門不閑年去水空澄稽首如何問森羅盡一乘

憶雲門舊遊送無著上人

朱放

誰能愁此別到越會相逢長憶雲門寺門前千萬峰石
牀埋積雪山路倒枯松莫學白道士無人知去蹤

入雲門五谿上作

許渾

此谿何處路遙問白髭翁佛廟千巖裏人家一島中魚
傾荷葉露蟬噪柳條風急瀨鳴車軸微波漾釣筒石苔

紫棹綠山果拂舟紅更就前谿宿村橋與剡通

雲門寄陳丘二侍郎

僧靈澈

年老心間無外事麻衣草座亦容身相逢盡道休官去
林下何曾見一人

會稽掇英總集卷六

欽定四庫全書

會稽掇英總集卷七

宋 孔延之 撰

雲門寺律詩

若耶谿附

若耶谿在會稽東南北流入鑑湖歐冶子鑄劍之所也戰國策曰涸若耶以取銅是也徐浩嘗云曾子不居勝母之間吾豈遊若耶之谿因改為五雲谿遊雲門寺者必經是谿故附於此

寄雲門亮師 虛象

玄度常稱支道林
南山隱處白雲深
一去人間長不見
千峰萬壑樹森森

同孔九泛若耶入雲門 恭母潛

同君此谿曲
託勝在煙霞
潭影竹裏動
巖陰天際斜
人言上皇代
犬吠武陵家
借問淹留日
春風滿若耶

寄靈一上人初還雲門 郎士元

寒山白雲裏
法侶自招攜
竹徑通城下
松門隔水西
方

同沃州去不作武陵迷髣髴心知處高峯是會稽

若耶谿

西施採蓮歐
冶鑄劍所

李紳

嵐光花影繞山陰山轉花稀到碧潯傾國美人妖豔遠
鑿山良冶鑄鑪深凌波莫借臨粧面瑩鍰當期出匣心
應是蛟龍長不去若耶秋水尚沈沈

若耶春興

僧皎然

春生若耶水雨後漫流通芳草行無盡清源去不窮野
煙迷極浦斜日起微風數處乘流望依稀似剡中

上巳日與鮑侍御泛舟耶谿

劉長卿

蘭橈漫轉傍汀沙，應接雲峯到若耶。
舊浦滿來移渡口，垂楊深處有人家。
永和春色千年在，曲水鄉心萬里賒。
君見漁船時借問，前洲幾路入烟花。

留題雲門山雍熙院

錢惟演

精舍依巖爨香林，結薜蘿崇臺涵夕靄。
危閣架春波，淨饌供蒲塞。真詮譯貝多，幾時輝晝錦。
松下駐鳴珂。

同前

范仲淹

一路入嵐堆還驚禹鑿開林無惡獸住巖有好泉來雲
陣藏雷去山根到海回莫辭登絕頂南望即天台

五雲谿醉歸

張伯玉

每日谿頭醉臉紅歸來庭院夕陽中依稀聽得家人語
扶取五雲谿上翁

若耶谿

陳舜俞

十里澄谿谿上山谿光無際照山顏天嫌俗眼尋常見
地借羣峰左右關蓬島也應非海外瓊壺爭合貯人間

維舟正欲踟躕飲坐見蒼煙暮翠灣

同前 錢公輔

若耶谿出若耶山浪影溶溶入醉顏
仙客曾因一箭贈
樵風長到五雲關
數峯蘸碧輕清外
雙舸浮春上下間
料得當年乘興子
為貪煙水宿前灣

遊雲門寺 趙誠

竟夕雨聲寒黎明日氣暄
峰巒添積潤谿澗漲新痕
鐘鼓連三寺杉松共一村
不須遊賞徧麗句滿清軒

古詩

宿雲門寺

宋之問

雲門耶谿裏泛舟路才通
黃綠篠岸遂到青蓮宮
天香衆壑滿夜梵羣山空
漾漾潭際月颼颼杉上風
茲馬逸嘉遁數子今莫同
鳳歸慨處士鹿化聞仙翁
樵徑謝村北學井何巖東
永夜豈云寐曉景忽朦朧
谷鳥轉尚澗源桃驚未紅
再來期春暮當造林端窮
庶以蹤謝客
開山投剡中

遊越中山水留雲門 孟郊

日覺耳目勝我來山水州蓬瀛若髣髴四野多泛浮碧
嶂幾千繞清源萬餘流莫窮合沓步孰盡派別遊越水
淨難污越天陰易收氣鮮無隱物目視遠更周舉俗媚
葱蒨連冬擷芳柔菱湖有餘翠茗圃無荒疇賞異忽已
還探奇始淹留永言終南山去矣銷人憂

登雲門山閣懷徐補闕 孟浩然

我行適諸越夢寢懷所歡久負獨往願今來恣遊盤台

嶺踐苔石耶谿泛林湍捨舟入香界登閣憩梅檀晴山
秦望近春水鏡湖寬遠遊佇應接卑位徒勞安白雲無
久滯滄海時來觀故國渺天末良朋在朝端遜爾同攜
手何時方挂冠

入雲門五谿上作

六言

顧非熊

舟泊有時垂釣舟行不廢閒吟沿山寺寺花樹枕水家
家竹林鴛鴦晝飛谿靜鸝鵒夜轉村深忽聞風動蓮葉
起見波間月沈

宿雲門寺

白居易

昨夜有風雨雲奔天地合
龍吟古石樓虎嘯生巖閣
幽意未盡懷更行三五市

送靈澈還雲門

辛應物

我歡長在夢無心解傷別
千里萬里人祇是眼中月

入若耶谿

崔顥

輕舟去何疾已到雲林境
起坐魚鳥間動搖山水影
巖中響自答谿裏言彌靜
事事令人幽停橈向餘景

宿道一上方院

王維

一公棲太白高頂出雲煙
梵流諸洞徧花雨一峰偏迹
為無心隱名因立數傳
鳥來還語法客去更安禪
晝涉松路盡暮投蘭若邊
洞房隱深竹靜夜聞遙泉
向是雲霞裏今成枕席前
豈惟暫留宿眠來將窮年

雲門符公蘭若最幽與薛八同往

孟郊

謂余獨迷方蓬子亦在野
結交指松柏問法尋蘭若
小谿劣容舟怪石屢驚馬
所居最幽絕所往皆靜者
密篠

陰路傍清泉流舍下上人亦河間塵念都已捨四禪合
真如一切皆虛假願承甘雲潤喜得慧風灑依止此山
門誰能毀丘也

酬綦母校書夢遊耶谿見贈

儲光羲

校文在仙掖每有滄洲心况以北窻下夢遊清谿陰春
看湖口漫夜入迴塘深往往纜垂葛出舟望前林山人
松下飯釣客蘆中吟小隱何足貴長年固可尋還車首
東道惠然若南金以我採薇意傳之天姥岑

奉同徐侍郎五雲谿新亭重陽宴集

獨孤及

萬峰蒼翠色雙谿清淺流已符東山趣况值江南秋白
露天地肅黃花門館幽山公惜美景肯為芳樽留五馬
照池塘繁絃催獻酬風前孟嘉帽乘興李膺舟騁望傲
千古當歌遺四愁豈令永和人獨擅山陰遊

耶谿泛舟

孟浩然

落景餘清輝輕棹弄谿渚澄明愛水物臨泛何容與白
首垂釣翁新粧浣紗女相看未相識脉脉不得語

春泛若耶留題雲門寺

蔡母潛

幽意無斷絕，此去隨所偶。
晚風吹竹舟，花路入谿口。
際夜轉西壑，隔山望南斗。
潭煙飛溶溶，林月低向後。
生事且瀾漫，願為持竿叟。

若耶春意

許景先

越水正逶迤，豔陽三月時。
中有嬋娟子，含怨望佳期。
鮮膚潤玉澤，微眇動蛾眉。
解珮遺中浦，折芳懷所思。
彩色豈不重，瓌豔難久滋。
一歌江南曲，再使妾心悲。

雲門寺

僧靈澈

湖邊歸鶴唳寥泐僧房半倚秦峰缺雲生幽石何逍遙
泉去疎林幾嗚咽天寒猛虎叫巖月松下無人空有雪
千年像教人不聞燒香獨為鬼神說

招道一上人居雲門

僧道猷

連峯數千里修林帶平津雲過遠山翳風至梗荒榛苑
茨隱不見雞鳴知有人間步踐其徑處處見遺新始知
百代下故有上皇民開此無事跡以待疎俗賓長嘯自

林際歸此保天真

題雲門無側道人房

僧皎然

越山千萬雲門絕高僧貌古還名月清朝拂石行道歸
林下眠禪看松雪

登雲門吳升亭

僧洪偃

蕭蕭物候晚肅肅天望清旅人聊杖策登高蕩客情川
源多舊跡墟里或新名宿煙浮始旦朝日照初晴遠行
乏徒侶徐步寡逢迎信矣非吾託賞心何易并

杖策歸若耶雲門

杖策步前嶺褰裳出外扉輕羅轉蒙密幽徑復紆威松
高枝影細山晝鳥聲稀石苔時滑屣蟲網乍黏衣澗傍
紫芝擘巖上白雲飛杉梓排煙去尚生寂弗歸窮谷無
還往攀桂獨依依

遊雲門寺留題靈運上人房

吳奎

雲門入雲深樹密山轉幽谿亭修竹裊激激玉泉流仁
智所遐想古今為勝遊我來休沐至窮覽殊難周金碧

樓殿千寒香松桂秋清風動高興飄越不可收禪師索
題詩捉筆事冥搜欲速馳思遠頃刻歷九州象外有真
物倘恍難為求徒形陳熟言羞澀為爾留

雲門寺

蘇舜欽

翠嶂環合封白雲中有蕭寺三為鄰

雲門梁武所作今
分為三寺相連

老松偃蹇若傲世飛泉奔薄如避人蒼後嘯斷夜月古
丹花開逼陽崖春盤桓數日不忍去舟出耶谿猶慘神

留題雲門山雍熙院

謝景溫

耶谿欲盡山轉青中有三寺山為屏秦峰表裏植蒼翠
仰視萬木相崢嶸雪霜洗盡塵土跡龍蛇蟄處煙氛生
我攜賓友事登覽穿徑已覺毛骨輕窮幽陟險興不盡
巖房留宿神逾清寒隨陰谷一夜來酒力半酣如不勝
狂歌出門步竹筵正見谿橋雙月明幽泉亂出石竇響
松風遠送哀猿聲凌晨後嶺縱俯仰長林翠阜何縱橫
獻之舊地不可辨懸崖欲斷石作坑五雲散盡遺跡滅
老僧至今傳此名憑高覽古復太息翻嗟萬事多廢興

丈夫出處固未測我於山水心難縈區區世路雖可厭
脫身向此誠獨醒豈如乘興事茲樂賞心不繫窮與亨
昔人避世非獲已我今安學禽鳥情

同前

吳處厚

三寺峙若鼎四山合如環偷攜野人杖默叩禪翁關草
樹冬不老雲煙秋更閒飄飄物外興又逐歸禽還

會稽掇英總集卷七

欽定四庫全書

會稽掇英總集卷八

宋 孔延之 撰

天衣寺

法華山在會稽南四十里晉義熙十三年僧曇翼棲

此誦法華經頗有靈感

普賢見

乃置寺因以為名梁天

鑿中昭明太子送金縷袈裟紅銀餅瑠璃鉢各一副

至會昌寺廢大中復興改寺額曰天衣山有十峯雙

澗嶂崢澄澈頗快登覽古今多有紀詠云

律詩

題法華山天衣寺

白居易

山為蓮宮作畫屏樓臺迤邐插青冥雲生座底鋪金地
風起松梢韻寶鈴龍噴水聲連擊磬猿啼月色閒持經
時人不信非凡境試入玄關一夜聽

同前

元稹

馬踏紅塵古塞平出門誰不為功名到頭爭似棲禪客

林下無言過一生

遊法華寺

李邕

山勢轉深看更好，嶺霞谿霧沒樓臺。
異時花向陰崖發，遠處泉從青壁來。
世界自知千古促，賢愚悉被四時催。
須知此地堪終老，七竅終成一寸灰。

題法華寺

李紳

花界無生地，慈宮有相天。
化娥騰寶象，留影閔金仙。
殿踞全身塔，池開半月泉。
十峯排碧落，雙澗合清連。

寺前後有

十峯迴繞 雙澗合流 藥草經行徧香燈次第燃戒珠高臘護心印

祖僧傳

此寺僧律嚴肅持經皆承師教

鉞識先羅漢衣存舊福田

寺有約法

師水耕梁朝宮人所刺袈裟

幻身觀火宅昏眼照青蓮住學超真境

依遊渡法船化城殊百億靈跡冠三千蕭壁將沈影梁

薪尚綴煙

寺有昭明太子畫真人梁時薪火常在

色塵知有數劫盡豈無

年龍噴疑通海鯨吞想漏川

寺有梁朝銅龍吐泉銅鯨飲流以注諸院

磬疎

聞啓梵鍾息見安禪指諭三車覺開迷五蔭纏教通方

便人心達是非詮貝葉千花藏檀林萬寶篇座嚴師子

迅幢飭網珠懸極樂知無礙分身應有緣
還將意功德留偈法王前

法華寺

吳融

寺在五峯陰穿緣一徑尋雲藏古殿
暗石護小房深宿鳥連僧定寒猿應
客吟上方應見海月出試登臨

書法華寺上方禪壁

方干

砌下松巔有鶴棲孤猿亦在鶴邊啼
卧聞雷雨歸巖早坐見星辰去地低
一逕穿緣應就郭千花掩映似無谿

是非生死多憂惱
此日蒙師為破迷

秦望山僧院

羅隱

巉巉危岫倚滄洲
聞說秦皇亦此遊
霸王卷依纔二世
老僧傳錫已千秋
陰崖水漱松根直
蘚壁苔侵畫像愁
各是病來俱未了
莫將煩惱問湯休

宿法華寺

僧皎然

心與空林共杳冥
孤燈寒竹自熒熒
不知處小乘客
一夜風前聞誦經

宿天衣寺

丁良史

春山多勝事，賞翫夜忘歸。
掬水月在手，弄花香滿衣。
興來無遠近，欲去惜芳菲。
更望鳴鐘處，樓臺深翠微。

題法華山天衣寺

曾會

十里湖光十里松，松陰路到十高峰。
窻看渡口隨湖月，樓聽雲門度嶺鍾。
梁帝鉢含山雨潤，普賢臺鏤鮮花重。
誰人的是忘機子，香稻寒蔬養瘦容。

遊天衣寺

趙誠

世稱幽景屬金仙若是精藍豈妄傳
澗湧雙泉雷出地山圍四面管窺天
唐僧手澤神毫健梁帝宸恩寶器妍
今日喜償平昔志更逢閩客此安禪

古詩

遊天衣寺

陸亘

處世空旦夕探幽放情志長歌向閭雲
引客遊古寺秦山倚寥廓高鳥下蒼翠
凝陰向杉松界法齊天地踈鐘遠僧舍
深殿有猿戲警梵千谿中真禪寂無二
寒泉聳

毛髮清露遣心累省慮因悟非勞神豈為貴超然靜中
見覺了愚勝智願得棲煙霞書之謝名利

登秦望山

薛據

南望秦望山極目大海空朝陽半暘谷晃朗天際紅谿
谷爭噴薄江湖遞交通而多魚商叟不悟歲月窮振緡
迎早潮弭棹候遠風予本萍泛者乘流任西東茫茫無
際帆棲泊何時同將尋會稽迹從此訪任公

應天寺

即寶林寺也寺因龜山高四十六丈周五百餘步在山陰之東數十步遠望若龜形故曰龜山又吳越春秋云越王築城已成怪山自生本瑯琊東武縣海中山一夕移來故名曰怪山里曰東武里起遊臺於上其東南為司馬門立三層樓冠山之巔曰靈臺所以灼龜又仰望天地怪也上有石井靈鰻時或見之乾符中改為應天

律詩

寶林寺

李紳

最深城郭在人煙，疑借壺中到梵天。
巖樹桂花開月殿，石樓風鐸繞金仙。
地無塵染多靈草，室鑿真空有定泉。
應是法宮傳覺路，使消煩惱見青蓮。

再遊應天寺聖母閣

錢侗

越地靈蹤多少處，伽藍難尚此樓臺。
有時風掣浪聲到，半夜月排山勢來。
極目煙嵐迷遠近，百般花木離塵埃。
可憐光景吟無盡，知我登臨更幾回。

登應天寺塔

潘閩

間上應天寺裏塔九層突兀入幽雲下窺已覺紅塵別
低語猶疑碧落聞秦望山高如髻簇照湖水濶若甌分
野人不管興亡事空凭危欄到日曛

留題應天寺昭慶大師房

杜衍

中懷無絆外緣間深掩禪扉客到難勝境可曾飛錫去
好山多祇卷簾看晝升講座天花落夜步吟軒海月殘
今日逢師堪論道歸心愁思一時寬

贈應天寺昭淨法華

出俗皆言為息機，性靈淨僻似師稀。
前山月落夜吟罷，深院菊荒秋講歸。
谿霧鎖窓燈焰短，雪風敲竹磬聲微。
會期雙闕重相見，應換當年舊衲衣。

題應天寺

齊廓

寶勢聳如飛，簷牙照錦暈。
路盤危磴出，僧觸斷雲歸。
萬井分塵界，千巖在目圍。
浮生枉多事，到此合忘機。

同前

王昌符

何事詩家稱翦裁，
跨虛相繼有樓臺。
水涵春碧雨初霽，
山露曉青雲半開。
寶塔禮終僧室靜，
粉牆題罷使車回。
此時欲結香蓮社，
祇為陶潛醉不來。

是日約會稽太博不至

書應天寺壁

此山名飛來云自瑯琊至

張伯玉

城郭鏖山林自無塵土，
侵一峯來海上高塔起。
天心世路有盈縮，
靈泉無淺深。
塔西北楹下有石泉一泓歲時無增減
使君今老矣，
閒處得閒吟。

古詩

題寶林寺

徐浩

茲山昔飛來遠自瑯琊臺孤岫龜形在深泉鰻井開越
王屢登陟何相傳詞才塔廟崇其巔規模稱壯哉禪堂
清潯潤高閣無恢矣照耀珠吐月鏗轟鐘隱雷揆余久
纓弁末路遭遭迴一棄滄海曲六年稽嶺隈逝川惜東
駛馳景憐西頽腰帶愁疾減容顏哀悴催賴居茲寺中
法士多瓌能洗心聽經論禮足蠲凶災永願依勝侶清
江乘度杯

飛來山 蔣堂

有山昔飛來神怪安可測萬壑鼓風雷千巖為羽翼胡
為忽移徙到此無傾側靈越得奇峯瑯琊失遺跡煙雲
隨而至杉篁古所植如何草創時偶作瞿曇宅聞之有

苾芻歲久苦剝刻鑿聲響深崖火燼淬層壁

詰之州人云向有僧

旦暮鑿是山鑄鑿不絕又加以火灼醋淬巖崖都盡

平為土木基茂有蒼翠色金

粟千億身窳堵百餘尺回廊盡複疊寸地無間隙一聚
紅塵中萬瓦青煙幕成彼有為善斯可長太息我試來

尋山山形俱變易方念此嶄絕安得如往昔不謂山之
足下落言偃室知是騫翥時於茲墮巖石屹爾畫疆畔
其誰敢侵蝕隨宜得形勝觸目見蒼翠小桂結濃陰清
露有踈滴巾屨日可賞琴樽雅成飾多謝對幽岑亦足
開煩臆若在祇園間豈更存餘碧

天章寺

寺去山陰縣西南二十五里乃晉王右軍蘭亭曲水
之遺趾故書堂墨池間有存者至道中因中貴人奏

請置寺以藏太宗仁宗御書於其上賜額曰天章云

律詩

題天章寺

孫沔

茂林修竹碧谿頭
梵宇深沈鑠翠幃
從此崇山頻企望
朝陽高處有松楸

泛照湖遊天章

吳奎

秦望奇峯北天章
野寺東石橋跨鷺瀨
雲屋麗層穹
片段磨礪密高低
結構雄盤基深鑿
岸飛勢聳凌空迴卻

熙蒸日虛含自遠風谿山形勝聚川陸往來通竹影搖
軒外松聲逼坐中孤煙惹樵叟輕浪濺漁翁氣象清無
比登臨杳莫窮直須圖畫看安得入神工

遊天章寺道中

蘇舜欽

畫鷁低飛湖水平回看樓閣滿稽城人遊鑑裏山相映
魚戲空中日共明盡是荷風香不斷忽逢谿雨氣尤清
藍輦却上蘭亭路猿鳥雲蘿伴此行

遊天章寺

曾鞏

藍輦朝出踏輕塵拂面毵毵柳色新
曲水豈能留往事
南湖空解照行人最宜靈運登山屐
不負淵明漉酒巾
老去飄零心未折暫須同醉海邊春

同前 顧臨

京國久昏車馬塵舊遊重到樂如新
谿山滿眼換清骨
樽俎開懷盡故人浩蕩自然間
日月踈慵便欲褫冠巾
吾儕用舍猶蟬蛻贏得湖南深訪春

同前 陳舜俞

峻嶺崇巔千古在好風佳月逐時新
簿書偶是山陰長觴詠聊同水曲人
林雀不驚筇竹杖谿雲欲傍接羅巾
官廳合有登臨分更待巖花爛漫春

同前

許安世

當時俯仰尚為陳千載重來感益新
曲水已傷迷故迹崇山依舊對遊人
縈紆雪路聯珠騎蕭爽風亭岸角巾
祇恐瑤池歸扈宴不能修禊見深春

題天章

劉詒

逸少蘭亭六百年別營樓閣奉金仙琅函帝賜三朝筆
猊座僧談二祖禪山怪有時渾露石地靈無處不通泉
塵心未悟真如理空爇晨鑪一篆煙

入天章道中

葉叅

帝俞荒址創毗耶茂嶺煙篁占一涯僧入定中觀水月
客來空際辯天花宸章飛動凌奎彩瀑溜清涼漲井華
不省永和年景趣飡聞虛座演三車

古詩

泛照湖遊天章 吳奎

愁霖不肯已陰結彌二旬吾遊欲及時秉燭出城門泛
泛一畫舫密坐環親賓爽氣忽侵袂重雲稍逡巡俄頃
萬里晴鬼魅伏清晨日光涌水態照灼無涯垠輕煙緬
以沒微風颭然振菰蒲動幽響撥刺驚潛鱗浮沈戲鷗
鷺蕩漾開萍蘋榜人發櫂歌漁翁理罾緝激越自成態
蕭灑何其真清輝不可狀野思徒紛紜弭棹山之阿行
行問吾民莓苔粘側逕馬足絕纖塵青谿曲折度茅屋

經過頻川涂斗開濶夷路夾松筠右轉聳雲構廣除礮
翠珉佛殿爍金碧標榜自玉宸修廊盤磴道等級華堂
新最後敞高閣局藏帝室珍冥心一薰拂璨璨羅星辰
大哉三聖筆天縱妙入神名家數幾百較古誰為鄰山
頭見塔影樹杪排嶙峋直上遽登造愛奇忘艱辛秋容
媚虛曠藹藹揚奇芬羣峰出圭角萬象皆縷陳森與翠
欲滴蒼茫寒襲人遠心窮碧海逸興凌高旻躊躇下煙
麓盼眇行復詢僧言王右軍遺跡永和春蘭亭有曩基

墨池含漪淪書室閔靈像五亭餘圓囿次第與探歷畢
景頤厥因簡累脫紛滓遺榮終幅巾逍遙自得場此節
固離倫憤恥以寄傲則非吾所遵涼飈拂修竹暮靄起
長津纓佩顧為忝城郭宜爾親回首已遙碧恍然塵世
分

禹廟

在會稽東南十餘里稽山之下禹嘗會東南諸侯計
功於此後沒因葬焉少康立祠於陵所今有禹墳窆

石猶存或曰梁時修廟欠一梁木夕有風雨漂至一木乃梅梁也

律詩

禹廟神座傾服金紫革自到鎮申牒禮司重加

袞冕今因祈雨偶成八韻

薛革

玉座新規盛金章舊制非列城初執禮清廟重垂衣不
覩千箱詠翻愁五稼微祇將蘋藻潔寧在餼牢肥徙市
行應謬焚巫事亦違至誠期必感昭報意猶希海日明

朱檻谿煙濕畫旂迴瞻郡城路未欲背山歸

禹廟 李紳

削平水土窮滄海畚鍤東南盡會稽山擁翠屏朝玉帛
穴通金闕架雲霓祕文鏤石藏青壁寶檢封雲化紫泥
清廟萬年長血食始知明德與天齊

遊禹穴 宋之問

禹穴今晨到耶谿此路通著書聞太史鍊藥有仙翁鶴
往的猶掛龍飛劍已空石帆浮海上天境落湖中水底

寒雲白山邊墜葉紅歸舟何慮晚日暮使樵風

題禹廟 錢侗

千古英靈孰令論西來神宇壓乾坤塵埃共鑠梅梁在
星斗俱分劍獨存蟾殿夜寒搖翠幌麝鑪春暖酌瓊樽
會稽山下秋風裏長放鬆聲入廟門

同前 張伯玉

寶穴千峯下巖祠一水傍夜聲滄海近秋勢越山長薄
葬超前古貽謀啟後王萬靈何以報終古詠懷襄

同前 蔣白

大禹歸天後南惟此廟存屋腥龍挂影巖黑雷燒痕夜
祭雲間火春輦浪裏門到今疏鑿水敢不向東奔

泊禹祠 潘閻

禹廟高高萬木齊蟾蜍影裏月光低山中不慣聞寒漏
一夜猿驚與鳥啼

癸未歲秋七月禱禹廟

萬古稽山下森森大禹祠幽人來暗禱靈魄望潛知帝

慮河頻決民憂業旋移自慙無異策載拜淚雙垂

訪禹穴至陽明洞

張伯玉

宛委山前艤畫船
攀蘿漸入太霄邊
因尋大禹藏書穴
深入陽明古洞天
萬壑秋光含細籟
數峯寒玉立蒼煙
寶函金篆久稀濶
欲就皇人講數篇

禹穴 錢公輔

一朵雲根壓衆嵐
古傳深坎自天鑿
藏書未必先王事
好怪惟聞太史探
洞府間來何寂寞
龍髯垂處認鬚鬚

近巖更剖知章字謾識奇蹤意亦甘

題禹廟

齊唐

削斷龍門劍力閑遺祠終古鑑湖邊崑墟到海曾窮地
石穴藏書不記年春色門牆花滴雨曉光臺殿水浮煙
塗山萬國梯航集告禪靈壇豈偶然

古詩

亂後經禹廟

庾肩吾

金簡泥新發龍門鑿始通配天不失舊為魚微此功秦

皇觀大海魏帝逐飄風去國嗟行邁頻年任轉蓬月上
關山北鄉臨天漢東申胥猶有志荀息大懷忠待見攬
搶滅歸來松柏同

謁禹廟

宋之問

夏王垂四載茲地發金符峻命終不易報功疇敢渝先
驅總昌會後至伏靈誅玉帛空天下衣冠耀海隅旋聞
厭黃屋更道出蒼梧林表祠轉茂山阿井詎枯舟遷龍
噴壑田變鳥耘蕪舊物森如在天威肅未除玄夷屈瑤

席玉女侍清都奕奕閨闈邃軒軒仗衛趨氣青連曙海
雲白洗春湖後嘯有時荅禽言長自呼靈歆異蒸糝至
樂匪笙竽茅殿今文襲梅梁古制無運遙日崇麗業盛
荅昭蘇伊昔力云盡而今功尚敷揆材非美箭精享愧
生芻郡職味為理邦空寧自誣下車霰已積攝事露行
濡人隱冀多祐曷唯霑薄軀

同前

崔詞

惟舜禪功始惟堯錫命初九州方奠畫萬壑遂橫疏受

錄嘗開洞過門不下車諸侯會玉帛滄海薦圖書玄默
將遺世崇高亦厭居耘田自有鳥濬澤豈為魚家及三
王嗣殷因百代如靈容肅清宇袞服閉荒墟棗徑愁雲
暮松扉撤祭餘叨榮陵寢邑懷古益躊躇

同前 益簡

九土昔淪墊八方抱殷憂哲王受洪範羣物承天休源
委有所在勤勞會東州稽山何峻極清廟居上頭律度
非外事辛壬寧少留歌謠自不去覆載將何求靈長表

遠績經啓著宏猷孰敢備佐命天吳與陽侯立功餘玉
帛茂實結松楸蓋影庇風雨湖光搖冕旒質明簫鼓作
通昔禮容修駢牢設舊物洿水配庶羞深沈本建極傲
很亦思柔陰怪尚奔走靈徒如獻酬悅疑仙駕動靜見
宿雲收竹樹依積潤菰蒲託清流謬茲領百越忽復歷
三秋丹懇諒可薦庶幾無年尤

拜禹廟

元稹

恢能咨岳日悲暮羽山秋父陷功仍繼君名禮不讐洪

水襄陵後元圭菲食由已甘魚父子翻荷粒咽喉古廟
蒼煙冷寒庭翠柏稠馬泥真骨動龍畫活晴留祀典稽
千聖孫謀絕一丘道雖汙世載恩豈酌沈浮洞穴探常
近圖書即可求德崇人不惰風在俗斯柔莢色湖光上
泉聲雨脚收歌詩呈志義簫鼓瀆清猷史亦明勲最時
方怒校酋還希四載術將以極虔劉

謁禹廟

徐浩

畎澮敷四海川源滌九州既膺玄圭錫乃建洪範疇昂

革固天啟運興匪人謀肇開宅土業永庇昏墊憂山足
靈廟在門前清鏡流象筵陳玉帛容衛嚴戈矛探穴圖
書朽卑宮堂殿修梅梁今不壞松柘古仍留負責故鄉
近竭來申俎羞為魚知造化歎鳳仰徽猷不復聞夏樂
惟餘奏楚幽婆娑非舞羽鐘鞳異鳴球盛德吾無間高
功誰與儔災淫破凶慝祚聖擁神休出谷鷲初語空山
援獨愁春暉生草樹柳色暗汀洲恩貸題與重榮殊衣
錦遊宦情同械繫生理任桴浮地極臨滄海天遙過斗

牛精誠如可諒他日寄冥搜

早謁禹廟

張伯玉

曉出五雲扃皎日麗初

闕

宿霧斂

闕

嚴

祠歎靈闕拂衽天風散不聽

曹娥廟律詩

曹娥廟碑

僧貫休

高碑說爾孝終難彈指端思白浪間堪歎行人不迴首
前山山是苧蘿山

同前 潘閻

曹娥廟前秋草平
曹娥廟裏秋月明
扁舟一夜曾無寐
近聽潮聲似哭聲

同前 姚鉉

簫鼓聲中浪渺瀰
古楓陰砌蘚封碑
行人到此自恭肅
不似巫山雲雨祠

同前 錢惟岳

曹娥廟貌樹豐碑
千古行人誦色絲
苦恨當年題八字

不旌賢孝祇旌辭

其二

尋屍抱柱兩俱難
二子留名滿世間
輕命一般同水溺
尾生泉下復何顏

同前

史溫

曹娥廟貌枕江湄
南北行人合孝思
有智不爭三十里
千年黃絹一廳碑

古詩

留題曹娥廟

蕭崗

屈平以楚死死濁不死清伍員以吳死死暗不死明死者人所難一死鴻毛輕壯哉二子為留得不死名曹娥以父死年齡童未成抱屍出洪濶非可二子并二子諫不從齊秦韓魏征娥若不之死父葬鱣與鯨二子死以介娥死以孝誠于今會稽人事之如事生娥若生堯時舜不妻女英娥若逢孔子娥名書孝經娥父若罹辜豈止為緹縈蔡邕不知娥但愛碑上銘我來拜祠下古木

寒雲橫往往大江水猶作哀哀鳴安得娥有知為我神
陰靈鼓此大江波注入四瀆平洗濯天下心皆行娥所
行



會稽掇英總集卷八